

Uunga siunnersuut: Utoqqalinermi pensionisiat pillugit Inatsisartut peqqussutaannik allanngortitsineq pillugu Inatsisartut peqqussutaat nr. xx, xx 2010-imeersoq.
(Isumaginninnermut Naalakkersuisoq)

Saqqummiussiissut

(Isumaginninnermut Naalakkersuisoq)

Siullermeerneqarnera

Nuannaarutigaa Naalakkersuisut sinnerlugit utoqqalinermi pensionit pillugit allannguutissatut siunnersuut saqqummiussinnaagakku, utoqqalinersialinnut aningaasaqarnikkut inuuniarnerminni atugarisaannik pitsanngortitsisuussaq.

Toqu maqaasinermik kinguneqaannartanngilaq, kisiannili aamma qanoq iliorluni aningaasaqarniarnikkut allanngornerit aaqqeriarnissaat ernummatigineqalersarput. Taamaattumik Naalakkersuisut nuannaarutigaat, Inatsisartut ataatsimoortumik aalajangiislinnaasimmata utoqqalinersiallit qimataannut atugassarititat pitsanngortinneqarnissaat pillugit.

Siunnersuut saqqummiunneqarpoq Inatsisartut UKA 2009-mi immikkoortoq 44-imi aalajangiisimanerat tunngavigalugu, tassalu Naalakkersuisut 2010-mi peqquneqassatut utoqqalinermi pensioni pillugit malittarisassat allanngortinneqarnissaannik saqqummiusseqqullugit, tamatuma kingorna toqusoqarneranut atatillugu utoqqalinermi pensionisialinni aapparisaq inooqatigisarluunniit utoqqalinermi pensionisiallip pensioniinik pissarsisinnaalersillugu toqusoqareernerata kingorna qaammatini marlunni. Toqusoqarnerata kingorna piffissami qaangiuteqqammersumi pingaaruteqartuuvoq, qimataasut naammaginartumik pilersorsinnaanissaminnut toqqammavissaannik qulakkeerunneqarsimanissaat. Qimataasumut piffissaavoq ilungersunartuusartoq, taamaanneratalu ajornakusoortissinnaavaa inuuniarnikkut aamma aningaasaqarniarnikkut kinguneriumaakkat nukissaqartinnissaat. Allannguutissatut siunnersuutip matumap qimataasut aningaasaqarniarnikkut periarfississavaat, piffissamik ilungersunartumik pisariaqartinneqartumik toqqissisimalluni qaangiisinnaanissamut.

Taamatut oqaaseqarlunga siunnersuut Inatsisartunut akuersaartumik suliassanngortippara.